

Köttöpar ko an katak in:

- Kwaļok bwe Anij ear jilkintok ri kanaan ro ñan katakin armej kōn mool.
- Kwaļok bwe Anij ej kōmman men ko Ej ba.
- Kwaļok bwe armej rej aikuj juon Ri Lomōor.
- Kwaļok men ko raar waļok ñan Israel kōn aer jab tōmak Anij.

Meļeļe ko reļap ilo katak in:

- Jen lo bwe Anij e kōnaan bwe jen jeļā E im iaļ ko An.
- Jen lo bwe e jab bwe kabuñ ñan Anij kōn iminene ak kōn loñed wōt.
- Jen lo bwe e nana ñe armej re jab tōmak Anij.
- Jen lo bwe je bane kien ko an Anij; jej aikuj juon Ri Lomōor.

Etke ewor juon holiday etan Kūrijmōj? Ej kōnke Kūrijmōj ej raan in ad kautiej im kememej kar ļotak eo an Jisōs. Unin ad kaorōk ļotak eo an Jisōs ej kōnke ļotak eo an eļap im aorōk. Ilo mool e aorōk ļok mej eo an Jisōs jān jabdewōt bar juon me ear etetal ioon laļ in.

Ilo jinoin Jenesis, ke eņōj an armej buñ, Anij ear kallimur bwe Ineen kōrā eo enaaj juur bōran Jetan. Jān iien eo liktak, tarin 4000 year, ro ri tōmak ilo Kallimur Mokta raar kōjatdikdik im kijerjer kake ļotak eo an Ineen Kōrā in. Anij ear barāinwōt kapeeki elōñ ri kanaan bwe ren kwaļok kōn Ri Kapit in.

Eņōj ke aņ kajjioñ in kwaļok ñan juon armej juon men me raar jab kōnaan roñ? E pen! Jet iien jej kauweik juon armej me jej yokwe e, im jej ba bwe eļāññe ej wanmaanļok ilo iaļ eo an, enaaj jorrāan. Kōn ad yokwe e, jej kōnono ñan e, ak bōlen armej eo e jab kōnaan roñ.

**\* Anij ej kōnono ippān armej.**

## 1. Naan ko an Ri Kanaan ro an Jeova.

Aiseia, Jeremaia, Ezekiel, Daniel, im Jona raar jet iaan ri kanaan ro im Anij ear jilkinļok ñan Israel im ñan laļ ko jet. Ri kanaan rein raar jiroñ ri Ju ro bwe ren oktak jān bōd ko aer, joļok ekjab ko aer, im lōke Jeova. Ilo tōre ko an ri kanaan rein, e nañin aolep ri Ju raar etal ñan tempel eo an Jeova im kabuñ ie. Raar jar ñan Jeova im katok ñan E. Bōtab, raar barāinwōt kabuñ ñan ekjab ilo mo ko imweir.



*Aiseia 2:8 Āne eo aer e barāinwōt obrak kōn ekjab ko; rej kabuñ ñan men eo eļtan peir, men eo addiin peir raar kōmanmane.*

Āinwōt jar katak mokta ļok, ejab bwe kabuñ ñan Anij kōn tiōd. Jen kabuñ ñan E kōn aolepen būruōd. Ak wōn e maroñ kōmman men in? Ejjeļok. Eñin un eo bwe jej aikuje juon Ri Lomōor.

Ri kanaan ro an Anij raar jiroñ ļok armej ro bwe ren ukeļok jān nana ko aer, joļok ekjab ko aer, im lōke

Anij wōt

- Jej kememej bwe ukeļok meļeļein “ukōt ad lōmņak.”
- Ņe jej ukeļok, jej errā ippān Anij kōn ad nana im ban, im je kōņaan oktak.

Anij e ban bōk ro im rej kabuñ ñan E kab kabuñ ñan men ko jet. Rej aikuj kōņaan E wōt.

Ri kanaan ro raar barāinwōt kakememej ro ri Israel kōn kien ko an Anij.

- Ro ri Israel raar jab pokake kien kein.
- Ri kanaan ro raar ba bwe Anij enaaj kajeik er eļañņe re jab ukeļok.
- Aiseia ear ba bwe Anij enaaj kajutak aelōñ in Assiria ñan kōkkure bwij ko joñoul ilo tu-eañ in Israel.
- Jeremaia ear ba bwe Anij enaaj kajutak aelōñ in Babilon ñan kōkkure Jerusalem im Juda.



*Aiseia 10:5,6 Jerata ñan kwe, Assiria, aļal in Aō illu. Jokoņ eo ilo peir ej Aō illu eļap! Inaaj jilkinļok e ñae juon aelōñ e nana, im ñae ro ri aelōñ me Ij illu ippaer. Inaaj jiroñ e bwe en bōk men in rakim, im bwe en bōk men in jibwe, im bwe en jure er aīnwōt pedkat ilo iaļ ko.*



*Jeremaia 20:5 Im Inaaj leļok aolep ņweiuk an jikin kweilok in im aolepen tokjān jermal eo an im aolepen men in aorōk ko an, im aolepen ņweiuk ko an kiiñ ro in Juda Inaaj leļok ña ilo peen ri kōjdat ro aer; im renaaj rakimi, im renaaj bōki, im renaaj bōkļok ñan Babilon.*

Anij e jab oktak. Ej Anij eo ear kōmānman lañ im laļ, im Ej kōmānman men ko Ej ba. Enaaj kajeik ro re jab kabuñ ñan E ilo wāween An ba.

## 2. Ri kanaan ro raar kwaļok kōn Ri Lōmoņor eo.

Jeova ear kwaļok elōñ men ko re kabwilōñlōñ ikijjien Ri Kapit eo An. Ear kaalikkar wāween An naaj ļotak im jikin An naaj ļotak ie. Ear kwaļok wāween An naaj mej, jerkakpeje, im lōmoņoren armej. Ri kanaan ro ilo Baibōl raar kwaļok kōn aolep men kein.

### \* **Anij ej kōnono ippān armej.**

Anij e jeļā men otemjej, im Anij e kōņaan kōnono ippān armej. Meñe enaņin aolep armej raar jab pukot Anij ak pokake E, im raar jab kōņaan juon Ri Lōmoņor jān jerōwiwi ko aer, Anij ear jab joļok An plan in jilkintok Ri Lōmoņor eo. Anij ej yokwe armej, im E jab kōņaan bwe jabdewōt en jako im etal ñan eñtaan indeeo.

## 3. Lōmņak an ro ri Israel kōn Anij, ri kanaan ro, im naan ko aer.

Ear wor jet ri Israel me raar tōmak Anij im naan ko an ri kanaan ro. Bōtab, e naņin aolep raar jab tōmak. Jet raar kaeñtaan im man ri kanaan ro jān Anij.

Elōñ raar wanmaañļok ilo aer ļoor manit ko re nana an ro ipelaakier.

Elōñ raar etal ñan tempel eo im kabuñ ñan Jeova, katok, im leļok juon mōttan joñoul, ak raar jab pokake Anij ilo aer mour jān raan ñan raan.

Raar ba jet men ko remman ñan Anij, ak Anij ear jab bōk er kōnke Ear jeļā bwe e jab mool būrueir ke raar ba men kein. Raar ba kōnke ear men in iminene wōt.



*Aiseia 29:13 Im Irooj eo ear ba, “Kōn an ro ri aelōñ in ruwaaktok ñan ippa, im kōn an loñeir im tieir koutiej Eō, a raar kōmmakūt būrueir ettoļok jān Ña, im aer mijak Eō ej juon kien armej, eo emōj katakin er kake;*

E nana ñe armej rej koutiej Anij kōn loñier, ak būrueir ettoļok.


Jet re jab kōñaan jar kōnke rej mōk kōn ro rej ankiliriab ilo eklejia ko, im re jab kōñaan bwe ren kain eo. Bōtab, jen jab likūt bwe nana an jet armej ak an jet kabuñ ren bōbrae ad kōmman jimwe. Jenaaj aikuj in uwaak ñan Anij kōn kōj make. Anij e jeļā wōn im būrueir rettoļok jān E, im juon raan Enaaj ekajet er.

### \* **Anij e pād ijoko otemjej.**

Je jab maroñ mone Anij.

- Armej rej lo ālikōd, im re jab maroñ lo būruōd.
- Anij e maroñ lo būruōd.

Anij e jeļā kōj ilo mool, im Ej ba bwe jej aolep ri jerowiwī. Jej mour ñan kōj make, im je jab kabuñbūruon Anij.



Raar man ri kanaan ro

E kar wor ri kanaan riab barāinwōt. Raar ba bwe raar jān Anij, ak raar jab. Raar kōnnaanōk armej ro bwe Anij e ban ekajet er im bwe enaaj emman aolep men.



*Jeremaia 6:13,14 Bwe jān ro re dik ñan ro re ļap, er otemjej eļap aer aņokņak, im jān ri kanaan ñan pris rej aolep kōmman riab. Im raar riab in kemour kinej ko an ro doō. Raar ba, ‘Aenōmman, aenōmman,’ ak ejjeļok aenōmman.*

Ejjeļok oktak wāween an Setan jermal ilo raan kein. Ej kajerbal armej me rej ba bwe rej kōnono naan ko jān Anij, ak re bōd. Ewor jet armej im jet ri kaki me rej ba bwe Anij e ban kajeik jerowiwī. Rej ba bwe, kōn an Anij yokwe armej, Enaaj bōk er aolep. Bōtab āindein an Anij kōnono ke? Jaab.

Jet rej ba bwe Anij e kōñaan bwe aolep ro rej ļoor E ren mweie im jab nañinmej. Rej ba bwe ekkar bwe Anij en liļok elōñ men ñan er.

Anij e jab muri ippān jabledwōt armej. Ej Irooj ion aolep. E wānōk im kwōjarjar, im Ej kōmman ankil An. Ro re jab tōmak E im itok ñan E renaaj eñtaan indeeo ilo lomalo in kijeek eo. E alikkar naan in Anij ilo Baibōl, im jej aikuj eproñ Anij im jab armej.

## 4. Anij ear ekajet Israel im Juda.

Anij e meanwōd. E jab mōkaj an kajeik ro ri jerōwiwi. Ilo tōr eo an Noa, Ear kattar iumwin jete iiō? 120. Ke ro ri Israel raar pād ilo Ijpt, Anij ear kattar bwe ro ri Kenan ren ukeļok im tōmak E. Ear kattar iumwin 430 iiō.

Ro ri Israel raar lōmṇak bwe Anij e ban kōkkure er. Raar lōmṇak bwe, kōn aer jermal ṇan Anij im katok im leļok, E ban likūt bwe ren jorrān. Bōtab jermal ko ad re jab maroñ lōmoṇoren kōj.

Ro ri Assiria raar itok im kōkkure Israel (bwij ko 10 me raar tu-eañ in Israel) im kajipōkweik elōñ iaan armej ro.



*2 Kiiñ 17:6-8 Ilo iiō eo kein ka ruwatimjuon an Hoshia, kiiñ in Assiria, ear bōk Sameria, im āñinļok ro ri Israel ṇan Assiria, im likūt er i Hela, im iturin Hebor, river in Gozan, im ilo jikin kweilok ko an ro ri Midia. Im āindein, kōnke ro nejin Israel raar jerōwiwi ṇae Jeova aer Anij, Eo ear kadiwōjtok er jān Ijpt, jān iumwin pein Pero kiiñ in Ijpt, im raar mijak anij ro jet, im raar etetal ilo kien ko an ri aelōñ ko, ro Jeova ear joļok er jān iṇaan ro nejin Israel, im an kiiñ ro in Israel, ko raar kōmṇani.*


Ro ri Assiria raar bōktok armej jān laļ ko jet bwe ren jokwe ilo Israel. Armej rein raar jab jeļā Jeova Anij. Elōñ iaer raar ṇare ro ri Israel me raar pād wōt ilo āneo, im ro nejeir, abkaj ro, jej ba rej “ri Sameria.”

Raar kabuñ ṇan Jeova, ak jab ilo wāween An ba. Kab raar abwin etal ṇan Jerusalem im jar ie āinwōt an Anij kar ba.

Ri ri Babilon raar itok im kōkkure Jerusalem. Raar kōkkure oror ko im tempel eo.



*2 Kiiñ 25:8,9 Ak ilo allōñ eo kein ka lalem, ilo raan eo kein ka jiljilimjuon in allōñ eo, eo iiō eo kein ka joñoul ruwatimjuon an kiiñ Nebukadnezar, kiiñ in Babilon, Nebuzaredan kapen an ro ri baar, karijeran kiiñ in Babilon, ear itok ṇan Jerusalem. Im ear tile ṇōn Jeova, im ṇōn kiiñ eo, im moko otemjej i Jerusalem, aet, jabdewōt eṇ eļap ear kōļoke.*



Eļap an jorrān ro ri Israel, ak aer wōt bōd. Anij ej katakin kōj bwe e jab bwe in nōbar E kōn tiōd. Kab, ad jermal im ad leļok ṇan E re ban juļok bōd ko Ad. Jān jinoin Baibōļ, Anij ear kōnono kōn juon Ri Lōmoṇor eo enaaj itok im bōk anjo ion jerōwiwi im Setan. E wōt e maroñ lōmoṇoren kōj.

Ri kanaan ro raar je men ko kōn Kraist tarin ruwalitōk bukwi year mōkta jān an Jisōs Kraist lotak. Devid ear juon kiiñ. Bōtab ear barāinwōt juon ri kanaan. Elōñ iaan Sam ko ear je, rej barāinwōt naan in rūkaanij kōn naaj itok eo an Jisōs Kraist. Aiseia ear bar juon ri kanaan me eļap an kōnono kōn itok eo an ri Lōmoṇor eo. Jen lōmṇak kaki jet iaan naan in rūkaanij ko aer.

## **E Nejin Devid**

(Matu 1:1) Aiseia 9:7 Enaaj ejjelok jemloken orlok in men in irooj eo An im ineemman, ioon turoon eo an Devid...

## **Enaaj lotak jan virjin**

(Matu 1:18) Aiseia 7:14 Kon men in, Irooj eo enaaj lewōj juon kakōlle: lo, juon virjin enaaj eta im enaaj keotak juon laddik, im naaj na etan Imanuel.

## **Enaaj lotak ilo Beetlem**

(Luk 2:4-7) Maika 5:2 A kwe, Beetlem Eprata, meñe kwe juon bukwōn edik iaan bukwōn ko toujin an Judah, jan kwe enaaj walok tok juon Ri tol im An wanmaanlok ko raar jan etto, jan indeeo.

## **Enaaj ko nan Ijpt**

(Matu 2:15) Hoseia 11:1 Ke Israel ear juon ajri, innam Iar iokwe E, im kur E jan Ijpt.

## **Enaaj alikkar kadkadin**

(Matu 3:16) Aiseia 11:2 Im Jetob in Jeova enaaj pad ioon, jetob in malotlot im jelajokjen, jetob in pepe im kajoor, jetob in jela im mijak Jeova.

## **Enaaj ennaan kon ro jet**

(Matu 8:17) Aiseia 53:4,5 Emool ear ineen ennaan ko ad, im boklok buromoj ko ad; a jaar lomnak bwe Anij ear man E, im denlok E, im kaeñtaan E. A emoj wakare E kon jerowiwi ko ad, im kakinejne E kon bod ko ad; kaje eo an adwoj aenommen ear pad ion, im kaajmour koj kon depetpet ko An.

## **Jeran enaaj ketak E**

(Jon 13:18) Sam 41:9 Aaet, jera eo e jitonboro ippa, eo Iar loke, ear bwijlok jimwin neen nae eo.

## **Enaaj ketak E kon 30 mottan jelba**

(Matu 27:9) Zekaraia 11:12,13 Im Iar ba nan er, Elañne emman ippami, innam letok oñeaō; ñe ejab, komwin kattar. Innam raar kajenolok jilnoul mottan jelba nan oñeaō.

## **Elon ri konnaan riab renaaj kinaaklok E**

(Matu 26:59) Sam 27:12 ...ro ri konnaan riab raar jutak nae Eo

## **Renaaj jeptak E im kaploiki**

(Matu 26:67) Aiseia 50:6 Iar lelok aliku nan ro ri jepak, im japeo nan ro raar tum jan koolen; Iar jab nooje turun Meja jan jook im ialok.

## **Eban walañi lonin ñe rej kinaaklok E**

(Matu 27:12) Aiseia 53:7 Ar kattaik E, a ke ar kaeñtaan E, ear jab walañi Lonin...

## **Ri Ju renaaj jolok E**

(Matu 27:39) Aiseia 53:3 Armej raar kajekdon im jolok E ...ar kajekdon E ainwot juon armej rej pinej mejær jan E...

## **Renaaj dike E im ejjelok unin**

(Jon 15:25) Sam 69:4 Ro rej kojdat eo im ejjelok unin

## **Renaaj wakare Peen im Neen**

(Jon 20:27) Sam 22:16 Jar an ri nana raar kapool eo; rej wakade neeo im peeo.

## **Renaaj gamble kaki kobe eo An**

(Matu 27:35) Sam 22:18 Raar ajej nuknuk ko ao nan doon, im raar komman kakolle ko kon ao kobe.

## **Enaaj mej ippan ro re nana**

(Luk 23:33) Aiseia 53:12 ...Ear lutoklok An nan mej, im ar bwini E ippan ro re bod. Ear ineklok jerowiwi ko an elon, im Ear komman men in medek kon ro re bod.

## **Renaaj kajjirere kake E im lokatipe**

(Luk 23:37) Sam 22:6,7 ...armej ran rej kakitütü kake eō, im ro ri aelōñ rej dike eō. Ro otemjej lo eō rej kajjirere kake eō...

### **Enaaj kallib ippān ri m̄weie**

(Matu 27:57-60) Aiseia 53:9 Im raar kōmman lōben ippān ro ri nana, im ippān juon ri m̄weie ilo An mej...

### **Enaaj jerkak jān ro re mej**

(Jermal 2:31) Sam 16:10 Bwe Kwō jāmin likūt aō ilo Hedis; im Kwō jāmin likūt Eo Am bwe En lo kūt.

### **Enaaj bar rōḡl ñan lañ**

(Epesōs 4:8-10) Sam 68:18 Kwōn wanlōñḡok ñan jikin e utiej, Kwar kajibōkweik ro ri kajibōkwe...

## **5. Jisōs Kraist ej Ri Lōmōḡor eo eḡōj kallimur kake jān jinoin laḡ in.**



*Jenesis 3:15 Im Inaaj likūt kōjdat ikōtaam im kōrā eo, im ikōtaan ineeḡ im ineen. Enaaj kōkkure bōram a kwōnaaj kōkkure jīmwin neen.*

Ke eḡōj an Adam im Ib jerōwiwi, Anij ear kwaḡok kōn juon Ri Lōmōḡor me enaaj itok im anjō ioon Jetan. Ilo aolepen Kallimur Mokta Anij ear kapojak ri Ju ro ñan An itok.

Ruo men rej aikuj bōk jikaer bwe jen pojak in bōk Jisōs Kraist.

Juon, jej aikuj kile joñan ad nana.



*Rom 3:20 Bwe ejjelok armej enaaj wānōk imaan Mejān kōn jermal ko an kien, bwe je jelā jerōwiwi kōn kien.*



*Rom 5:20 A kien ear koba im delōñ bwe buñ en orḡok...*

Ruo, jej aikuj tōmak bwe Jisōs wōt e maroñ kowānōk kōj im lōmōḡoren kōj ñan indeeo.



*Galetia 3:24 Āindein kien juon ad ri lale in tōl kōj ñan Kraist bwe jen wānōk kōn tōmak.*

Jeova ear kajerbal ri kanaan ro An ñan kapojak iaḡ eo an Jisōs Kraist.

---

### **Kajjitōk ko**

1. Armej ro ilo Kallimur Mokta eḡap aer kōjatdikdik kōn wōn?
2. Wōn in Ineen Kōrā eo?
3. Anij ear kapeeki wōn ro bwe ren kōnnaan kōn Kraist?
4. Ri Ju ro raar kabuñ ñan Jeova ke?
5. Innām etke Anij ear jab mōñōñō ippāer?
6. Ri Kanaan ro raar kwaḡok bwe Jisōs enaaj ḡotak ilo menmenbwij eo an wōn?
7. Ta eo ear waḡok ñan armej in Israel im Juda kōn aer jab tōmak Anij?
8. Kwōj aikuj in kile ruo men bwe kwōn ukeḡok. Ta ko?